

Mud Volapüka

Nüm 15

15 yulul 2016

Rubrig gramatik

Ba, bo

Ladvärbs „ba“ e „bo“ jonons das jen semik kanon (mögon) jenön.
Efe „ba“ sinifon das jen at binon seledik, ti neveratik:

ba ugaenob dolaris balion pö loter = **mögos das** ugaenob dolaris
balion pö loter **ab atos binon ti neveratik**

ba udagetob rekordi in marat = **töbo** udagetob rekordi in marat

Gü „bo“ sinifon das jen at binon vemo luveratik:

telna tel binon fol **bo** = **mögiküno** telna tel binon fol

bo ogödo sol ulöädon pö lofüd = **mögiküno** ogödo sol ulöädon pö
lofüd

ba udagetob rekordi in marat = **bo no** udagetob rekordi in marat
= **mögiküno no** udagetob rekordi in marat

Bai

Foyümot „bai“ sinifon das jenöfot pasevon danädü yeg semik u
labon patöfi ma (leigik lä) yeg:

bai taib naedama telna tel binon fol = **ma taib naedama** telna tel
binon fol = **danädü taib naedama** sevoy das telna tel binon fol

bai sev obik ... = **ma** sev obik ... = as sevob ... = sevob das ...

bai ced obik ... = **ma** ced obik ... = cedob das ...

baicedob ko flen obik = cedob maä ced flena obik = ceds obiks
(oba e flena obik) leigons = siob cedi flena obik

Baik

Ladyek „baik“ jonon das jen, dun binon veratik, mögik ön stips semik:

balidbitid filmota at binon **baik** ün yel fovik = filmot at **baiko**
pojonedon balidnaedo ün yel fovik = **mögiko** das balidbitid filmota at
ujenon ün yel fovik

Bei

Foyümot „bei“ sinifon das drefäb emufon nilo yeg e no stöpölo bleibon mogolön de ut:

naf **ebeifloto**n kävi = naf *efloto*n **bei** käv = naf **no** *ejolon* **lü** käv
ebeidrefob zeili = epölakalkulob e no edagetob zeili

Bi

Konyun „bi“ yümon setis tel efe balid onas binon lepük, jen e telid onas binon dinäd, stip daveda balida:

eluumikob **bi** *ireinos* = eluumikob **dub (dubä)** *rein ijenöl* = *rein ijenon* **ed klu** eluumikob = eluumikob **demü** *rein*

logob nosi **bi** *dag* = logob nosi **demü** *dag* = logob nosi **kodü** *dag*

Bis

Ladvärb „bis“ sinifon „nemu“, „**saidos te**“, „pu“ e jonon minumi pavidöl e **saidik**:

bis *ukömomös* = **saidos te** (pro ob) *if ukömom* = **vilob te**
ukömomös = *if ukömomöv* **atos ubinon saidik** (pro ob)

givolös obe **bis** *dolaris tel* = givolös obe **nemu** *dolaris tel* =
givolös obe **pu** *dolaris tel* = givolös obe **ze** *dolaris tel* = givolös obe
no neplu *dolaris tel*

Bisä

Konyun „bisä“ sinifon „if **te** ...“, „**te** üf ...“ e jonon stipi **lezesüdik**:
uduinoböv atosi **bisä** usivob *dolaris tel* = uduinoböv atosi **te üf**
usivob *dolaris tel* = uduinoböv atosi **a** *dolars tel*

Bisü

Präpod „bisü“ sinifon „if...“, „üf ...“ e jonon stipi zesüdik:
uluimikoböv **bisü** *oreinos* = uluimikob **pö** *rein* = uluimikoböv **if**
oreinos = uluimikoböv **üf** *oreinos* = uluimikoböv **stipä** *oreinos*
bisü föl = ön duin (kotenükam) büdas (stipas)

Bü

Präpod „bü“ jonon das jen semik jenon gölikumo ka jen votik pö
tim:


sol ilöädon **bü** *egalikob* = sol ilöädon **ya ven** *egalikob*

ifealotädob (isio) **bü** *yels tel* = lödob tö spad at (iso) ya ünü *yels tel*

glok etonon **bü** *brefüp* = glok etonon *änu*

Sevols-li, das ...

Fransän



1) In cif ti alik Fransäna dabinon süt nemü hiel ‚Victor Hugo‘.

2) Fransänapük binon pük calöfik noe Fransäna abi länas plu kildeg votik (as sam, Jveizäna, Kanadäna, Viorajoräna, Monakäna, Luxemburgäna, Kongoläna, Nigeräna e rets). Fransänapük binon motapük pro mens plu teltumveldegbalion. Te pükis tel – Linglänapüki e Fransänapüki – tidoys tö län alik vola. I lärnöys Fransänapüki suviküno ka pükis votik plä Linglänapük.

3) Vöd Fransänapükik „Salut“ sinifion leigüpo „Glidö“ äsi „Adyö“.

4) Pö „Volut Gretik Fransänik“ pro dötums veldeglul länanefa (lödanas) Fransäna Fransänapük no binon motapük.



5) Fransän binon gudikün pavisitöl län vola. Labü länanefi te mö mäldegvelbalion, pavisiton alyelo fa mens mö plu veldeglulbalion. Efe spad pöpedikün tö el ‚Paris‘ binon ni Tüm hiela „Eiffel“ (el „tour Eiffel“, törans mö balions lul e laf a yel), ni el „Musee du Louvre“ (törans lulbalion a yel) ab el „Disneyland“ ela ‚Paris‘ (törans degkilbalion a yel) kel binon el „Disneyland“ balik tö Yurop.



6) Tö Fransän anu kaseds plu foldegmil dabinons.

7) Lemaket balid Fransänik pimaifükon fa hiel „Aristide-Jacques Boucicaut“ ün yel 1838.

8) Ün yel 1984 tö Fransän bid (revid) gölik bevüresoda (ela ‚Internet‘) ijäfidon tiädü el ‚Minitel‘. Gebölo oni Fransänans ikanons pelön kalotis e bonedön fabrikotis de magads.

9) Datuvots Fransänik sevädikün: bälunaflit, dismelanaf, falajelöm, numian, balidlekäl, film, saikul, baolet, metöf.

10) Kösömots ad matikön in kloted vietik (sis yel 1499) ed ad dekön firi pö yelacen idavedons tö Fransän.



11) Fransän binon motedalän kanitana jiel ,Mireille Mathieu'.

Säkis, küpetis e lofotis aliks ä materis e volanuns
nitediks kanols lüsedön lü penedabog «komunan@yandex.ru».